

# PM sempurnakan istiadat meletak kalungan bunga Hari Pahlawan

Um - 1/8/2006

KUALA LUMPUR 31 Julai - Datuk Seri Abdullah Ahmad Badawi hari ini menyempurnakan istiadat meletak kalungan bunga di Tugu Peringatan Negara sempena Hari Pahlawan 2006 sebagai memperingati wira yang gugur semasa mempertahankan tanah air.

Cuaca redup dan persekitaran Tugu Negara yang basah akibat hujan lebat awal pagi, tidak menjejaskan istiadat tersebut.

Perdana Menteri yang tiba pada pukul 9 pagi, memulakan upacara simbolik itu dengan memeriksa perbarisan kehormat Batalion 1, Rejimen Askar Melayu Diraja yang mengandungi 106 anggota diketuai Mejar Qadri Abu Bakar.

Ia diikuti tiupan lagu *Last Post* untuk memperingati pahlawan negara yang gugur di perbatasan, disertai deklamasi sajak bertajuk *Pah-*

*lawanku* oleh Leftenan Kolonel Mohd. Radzi Abd. Hamid.

Sajak itu sebagai mengenang jasa pahlawan negara yang terkorban di medan perang sejak Perang Dunia Kedua, zaman darurat dan semasa menjalankan misi keamanan di bawah mandat Pertubuhan Bangsa-Bangsa Bersatu (PBB).

Perdana Menteri kemudiannya mendahului acara peletakan kalungan bunga di kawasan khas berhampiran Tugu Negara. Ia kemudiannya diikuti Panglima Angkatan Tentera, Laksamana Tan Sri Mohd. Anwar Mohd. Nor dan Ketua Polis Negara, Tan Sri Mohd. Bakri Omar.

Turut berbuat demikian ialah Panglima Tentera Darat, Jeneral Tan Sri Abdul Aziz Zainal; Pemangku Panglima Tentera Laut Diraja Malaysia (TLDM), Laksamana Madya Datuk Ramlan Mohamed Ali dan Panglima

Tentera Udara Diraja Malaysia (TUDM), Jeneral Tan Sri Nik Ismail Nik Mohamed.

Presiden Persatuan Bekas Tentera Malaysia, Senator Datuk Muhammad Abd. Ghani dan Timbalan Presiden Persatuan Bekas-Bekas Polis Diraja Malaysia, Datuk Yusof Hamdian Diego turut mengalungkan bunga.

Majlis itu turut dihadiri beberapa menteri Kabinet, timbalan menteri, pegawai kanan kerajaan, wakil-wakil rakyat dan diplomat asing.

Sebelum berlepas pulang, Abdullah sekali lagi menerima tabik hormat dan memeriksa kawalan kehormat.

Hari Pahlawan disambut 31 Julai setiap tahun sebagai mengenang dan menghargai jasa wira negara yang terkorban serta cedera ketika mempertahankan kedaulatan agama, bangsa dan negara.